

DISCURSO DO SANTO PADRE
Encontro ho bispos, sacerdotes, diáconos,
peessoas consagradas, seminaristas no catequistas

Catedral, Díli

Terça-feira, 10 de setembro de 2024

Ha'u haksolok tebes mai iha imi nia leet, contexto viagem ida nebé ha'u tau ha'u nia-an nu'udar peregrino ida iha rai oriente. Ha'u agradece bispo Dom Norberto do Amaral ba liafuan sira nebé bispo hato'o mai ha'u hodi hanoin katak Timor-Leste nação ida nebé iha mundo nia rohan nune'e ha'u hakarak dehan precisamente tanba rai ne'e iha fronteira ka iha rai ninin, rai ne'e existe iha evangelho nia centro tanba iha Cristo nia futar fuan hanesan ita hatene buat sira nebé existe iha preferia iha rai ninin mak sai centro. Evangelho ne'e nakonu ho ema sira, figura sira no história sira nebé iha preferia iha fronteira ka rai ninin maibe iha Jesus bolu sira no sira nakfilak sai protagonista ba esperança nebé nia lori mai.

Ha'u haksolok ho imi no tanba imi, tanba rai ida ne'e imi mak Na'i nia discípulo sira, hanoin ba naha todan ho desafio sira nebé imi hasoru ne'e halo ha'u hanoin hetan situação ida nebé sugestivo tebes iha evangelho São João nian nebé haktuir episódio ida kona ba ternura no intimidade nebé acontece iha uma Jesus nia belun sira, Lázaro, Marta no Maria(*Jo 12, 1-11*). Iha momento ida durante han kalan hamutuk Maria “habokon Jesus nia futar ain ho mina morin nardo puro ida nebé karun tebes hafoin nia hamaran Jesus nia futar ain ho nia fuuk, uma laran tomak sai nakonu ho mina morin furak perfume ne'e nian.” (v.3)

Maria kose mina morin ba Jesus nia futar ain no perfume ne'e hamorin naresin iha uma laran tomak, ha'u hakarak reflete oituan ho imi kona ba ida ne'e, mina morin perfume Cristo nian no evangelho nian domin ida nebé ita tem que rai didi'ak no ita simu vocação atu habelar, rai didi'ak perfume ida ne'e, habelar ka hada'et perfume ida ne'e, ita hakarak medita kona ba ida ne'e.

Rai didi'ak perfume ne'e, ita sempre sente necessidade atu fila fali ba origem ka hun husi dom nebé ita simu tiha ona, hun husi ita nia an nu'udar ema cristão, nu'udar nailulik, nu'udar consagrados/as sira ka nu'udar catequista sira, moris ne'e rasik ita simu husi Na'i Maromak liu husi Nia Oan mane Jesus nebé mate tiha ona ba ita no haraik tiha ona Nia Espírito Santo ba ita,

Nia kose ita nia ulun ho mina ksolok nian no São Paulo hakerek “ba Na’i Maromak ita mak Cristo nia morin furak.” (2 Kor 2, 15).

Doben sira imi mak perfume ka mina morin Cristo nian no símbolo ida ne’e la’os buat foun ida ba imi: iha Timor ne’e tebes duni, ai kameli ka sândalo moris wa’in naresin ho nia morin ida ne’e ema fo folin boot no buka hela de’it nomos husi povo no rai selu-seluk, ita rasik tane aas ai kameli ne’e wainhira haktuir katak liurai feto Sabá nian ba visita liurai Salomão hodi oferece ai kameli ka sândalo ba nia (cf. 1 Rs 10, 12).

Maun alin inan feton sira, imi mak evangelho nia perfume ka mina morin iha rai ida ne’e hanesan ai kameli ka sândalo hun ida nebé nia tahan verde hela de’it no forte nebé sai boot no nafuan nune’e mos imi mak discípulos missionário sira nebé simu ona perfume husi Espírito Santo atu hamorin imi nia povo nia moris.

Maibe ita labele haluhan buat ida perfume ka mina morin nebé ita simu husi Na’i Maromak ita tem que rai ho cuidado hanesan Maria husi Betania nebé rai didi’ak perfume especialmente ba Jesus, ita mos tem que rai didi’ak domin nebé Na’i Maromak uza hodi hamorin ita nia moris atu perfume ne’e labele sai mihis no la lakon nia morin ne’e significa iha consciencia kona ba DOM nebé ita simu tiha ona, hatene katak perfume ne’e la’os ba ita maibe atu hodi kose Cristo nia futar ain hodi haklaken evangelho no hodi servi ba ema kiak sira, ne’e significa atu matan moris neon na’in ba ita an rasik tanba baruk ten ka laran malirin espírito aat hafuhu hela de’it ita.

No ha’u hakarak aumenta tan buat seluk ida, ita hare ho gratidão ba história nebé liu tiha ona, ita hare ba fini fiar nebé missionário sira karii tiha ona iha rai ida ne’e, ba escola sira nebé forma agente pastorais no buat barak seluk tan maibe buat hirak ne’e hotu naton ona ka seidauk? Los duni ita tem que halakan nafatin ahi fiar nian tanba ne’e ha’u hakarak dehan ba imi labele husik hela kna’ar atu haklaken doutrina cristão atu bele sai tasak liu husi formação spiritual, catequetica no teologica tanba buat sira ne’e hotu ita precisa atu bele haklaken evangelho sai imi nia cultura no nune’e mos ita precisa atu purifica cultura ne’e husi forma tradição tuan sira nebé dala ruma superfessiosa iha buat di’ak barak nebé furak iha imi nia cultura especialmente ha’u hanoin kona ba fiar iha moris hias, fiar iha presença matebian sira nia klamar maibe buat sira ne’e hotu tem que hetan purificação nafatin iha roman evangelho nian husi igreja nia doutrina,

imi haka'as an ba kna'ar ida ne'e tanba "cultura hotu-hotu no grupo social hotu-hotu precisa tebes purificação amadurecimento" (*Exort. ap. Evangelii gaudium*, 69).

Oras ne'e ita to'o ba iha aspecto daruak, habelar perfume ka rega mina morin. Igreja existe atu haklaken evangelho no ita simu vocação atu lori mina morin furak moris foun evangelho nian ba ema seluk, Maria husi Betania la uza mina morin folin boot ne'e atu kose hamorin nia an rasik maibe nia kose ba Jesus nia futar ain no nune'e hamorin uma laran tomak nune'e mos evangelho São Marcos nian especifica katak Maria atu bele kose mina morin ba Jesus, nia harahun tiha botir vidro mina morin nia fatin (*cf.* 14, 3), evangelização acontece wainhira ita iha coragem atu fera botir frasco perfume nia fatin atu hasai tiha "kulit liur" nebé dala barak sulan ita iha ita nia an rasik atu sai husi religiosidade nebé baruk ten no cómoda nebé halo ita usa ba necessidade rasik de'it. Ha'u gosta expressão nebé irmã Rosa usa iha nia testamunha Igreja ida nebé iha movimento laran, Igreja ida nebé la para, Igreja nebé la hanoin ka la *sibuk* kona ba nia an rasik de'it maibe Igreja ida nebé lakan tanba ahi domin atu lori ksolok evangelho nian ba ema hotu-hotu.

Nune'e mos iha imi nia nação nebé iha abut metin iha história cristã nebé naruk ohin loron precisa impulsso foun ida ba evangelização atu perfume evangelho nian to'o ba ema hotu-hotu, perfume reconsiliação no paz nian liu tiha tinan naruk terus funu nian, perfume com paixão nian nebé tulun ema kiik sira atu hamriik fila fali no hamosu serviço boot atu hadia nação nia destino economico no social, povo justiça nian contra corrupção no especialmente imi tem que habelar perfume husi evangelho ba buat hotu-hotu nebé hatun ema, halo kleuk ka to'o estraga ema nia moris contra kanek sira nebé hamosu vazio interior no terus oi-oin hanesan autolismo, violencia no falta respeito ba dignidade feto sira nian, Jesus nia evangelho iha kbiit atu transforma realidade nakukun hirak ne'e hodi hamoris sociedade foun ida.

Doben sira, ita precisa impulso husi evangelho ne'e no tanba ne'e ita precisa nailulik sira, consagrados/as sira no catequista sira nebé iha paixão preparados no creativos, ha'u agradece testamunho husi senhor Florentino, catequista ida nebé didica parte boot husi nia moris ba ministerio ida nebé furak tebes ne'e no especialmente ba nailulik sira katak ha'u hakarak dehan buat tuir mai ne'e: ha'u hatene katak povo sarani fihir ba imi ho domin boot no bolu imi "amo" nebé marca titulo nebé importante liu iha imi nia leet no ne'e significa "senhor" ka "na'i" maibe ida ne'e labele halo imi hakiak sentimento superioridade nia relação ho povo hodi lori imi ba

tentação ba orgulho no poder. Titulo ne'e labele halo imi hanoin katak ministerio ne'e prestígio social ida hodi halo imi sai hanesan chefe boot sira nebé domina ema seluk.

Ita tem que hanoin buat ida ne'e, ho perfume ita hamorin Cristo nia futar ain nebé mak na'in husi maun alin sira nian iha fiar nia laran hahu husi sira nebé kiak liu, iha ne'e iha gesto ida forte tebes wainhira povo sarani sira hasoru nailulik sira, sira kaer imi nia liman consagrado, dada imi nia liman ba sira nia reintos nu'udar sinal benção, furak tebes atu ita hare sinal ida ne'e domin nebé povo santo iha tanba nailulik mak instrumento ida benção nian, nunca bele aproveita imi nia função maibe nafatin tem que fo benção, consola, sai ministro compaixão nian no sinal misericórdia nian.

Maun alin inan feton doben sira, diplomata portugês ida husi século XVI, Tomé Pires hakerek nune'e "ema comerciante sira husi malaiu sira dehan Maromak cria Timor ba ai kameli" (*The Summa Oriental, Londres 1944, 204*). Maibe ita, ita hatene katak iha perfume seluk ida nebé husi Cristo no husi evangelho nebé hariku moris no hakonu moris ne'e ho ksolok.

Imi labele desanima hanesan padre Sancho fo hanoin ita iha nia testamunho nebé como venssis Maromak hatene tau matan ba sira nebé Nia bolu no Nia haruka ba missão. Ha'u fo benção ba imi husi klean ha'u nia fuan no ha'u husu favor ida ba imi atu reza ba ha'u. **Obrigado.** Agradece ba amo no madre sira nebé ferik no katuas, sira mak ita nia osan mean.

Traduzido por Marvel

@ DEPARTAMENTO COMUNICAÇÃO CET